

FORUM JATI DIRI

Anjuran bersama



BERITA HARIAN



PERSKOM

Dengan kerjasama Universiti Malaysia Pahang (UMP)
23 Mac 2011 (Rabu)



800

pelajar pupuk semangat jati diri

Lebih 800 terdiri mahasiswa Universiti Malaysia Pahang (UMP), Kolej Komuniti Paya Besar dan Kolej Matrikulasi Pahang hadir memeriahkan Program Merentas Kampus dalam membentuk jati diri sebagai ketahanan diri dan ketrampilan mahasiswa universiti pada 23 Mac 2011 yang lalu.

Program anjuran Jabatan Penerangan Malaysia dengan kerjasama Gabungan Penulis Nasional (GAPENA), Berita Harian dan Persatuan Sarjana Komunikasi (PERSKOM) ini menyaksikan UMP sebagai tuan rumah bagi Program Siswa Gemilang/Rentas Kampus yang berlangsung di Dewan Astaka UMP.

Menurut Naib Canselor UMP, Profesor Dato' Dr. Daing Nasir Ibrahim, program ini bertujuan memberi pemahaman di kalangan generasi baharu hari ini mengenai peranan jati diri dan memigrasikan minda ke arah yang lebih kreatif serta inovatif.

"Ianya juga dilihat sebagai satu langkah untuk membina budaya pemikiran kreatif di kalangan pelajar. Pembentukan minda pelajar pada masa ini akan membentuk generasi masa hadapan," katanya semasa merasmikan majlis tersebut.

Forum Jati Diri 1Malaysia dengan tajuk Mahasiswa Kreatif menampilkan ahli panel



yang terdiri dari Datuk Dr. Mansor Abdullah dari Gabungan Penulis Nasional (GAPENA) dan Dr. Bazrul Bahaman yang merupakan pensyarah Universiti Perguruan Sultan Idris (UPS).

Dalam forum ini, Dr. Bazrul mengupas maksud jati diri yang membawa maksud suatu identiti yang ada pada diri sendiri yang akan membentuk ketahanan diri bagi membolehkan seseorang berhadapan dengan kehidupan yang semakin mencabar.

Beliau yang membawakan contoh bahasa Melayu iaitu datangnya dari zaman sejarah yang berabad tahun dahulu sebagai satu bahasa yang tidak boleh ditukar ganti.

Malah, ianya dijadikan sebagai sifat jati diri yang perlu dipertahankan agar terus hidup.

Justeru, kefahaman mengenai maksud jati diri perlu difahami pelajar seterusnya dapat diterjemah dalam setiap aspek kehidupan

dalam membina bangsa 1 Malaysia.

Seorang peserta yang merupakan pelajar daripada Fakulti Kejuruteraan Elektrik & Elektronik (FKEE), Siti Norlis Zulkifli, 22 berkata forum hari ini banyak memberi pengetahuan tentang jati diri dan Konsep 1 Malaysia.

Beliau mengingatkan kata-kata Datuk Dr. Mansor yang memberikan contoh makanan roti canai yang dikaitkan dengan masyarakat India kini turut diminati kaum lain dan ini menunjukkan masyarakat Malaysia boleh menerima cita rasa makanan dan budaya kaum lain.

Malah menurutnya, pelajar juga perlu menguatkan jati diri dengan mengamalkan cara hidup bangsa Malaysia seperti bertutur secara halus dan bersopan terutama ketika berinteraksi dengan pensyarah atau bersama rakan di universiti.

Hadir sama Pengarah Penerangan Pahang, Datuk Hasnah Hassan.